

SCRIPT OF MORNING GOJRI NEWS BULLETIN 27DEC 2025 1015HRS

مارننگ گوجری نیوز بولین 27 دسمبر 2025

یوہ آکاشوانی جموں ہے عبدالرحمان تیں خبر سُنو۔

SHAH COUNTER TERRORISM

مرکزی وزیر داخلہ امت شاہ نے ملک پھر مانہہ ایک سانجہ انسداد دہشت گردی سکارڈ گا ٹہانچہ غا قیام ور زور دتوہے تے ریاستاں غا ڈائریکٹر جنرل پولیس نانہہ ہدایت دتی ہے جے اس نانہہ جلد از جلد نافز کیو جے جناب امت شاہ نویں دلی مانہہ این آئی اے غے زیر اہتمام منعقدہ دو روزہ انسداد دہشت گردی کانفرنس 2025 غا افتتاح توں بعد خطاب کر رہیا تھا اُنہاں نے پہلگام تے دلی بم تھامہ غا معاملات غی تحقیقات نانہہ مضبوط تے چکنا پولیسنگ غی مثال قرار دیتا واں سراہیو وزیر داخلہ نے کہیو جے حفاظتی دستاں نے آپریشن سندور غے ذریعے دہشت گرد منصوباں ساڈاں نانہہ کامیابی سنگ سزا دتی تے آپریشن مہادیو غے تحت حملہ آوراں نانہہ بے اثر کیو اُنہاں نے جموں کشمیر پولیس غی وی تعریف کی جے اُس نے دلی مانہہ ہون آلا تماہکاں غی شاندار تفتیش کی تے پورا دہشت گرد نیٹ ورک نانہہ موثر طور ور ختم کیو۔

LG VEER BAAL DIWAS

لیفٹیننٹ گورنر منوج سنہا نے کہیو کہ مارا ملک مانہہ ایک نوی توانائی تے جوش آہو بے تے ہم نانہہ مل غے مضبوط عزم غے نال اپنا خواباں غو وکست بھارت بنا ن غو عہد کرنو چاہیے۔ اُنہاں نے یاء گل ویر بال دیوس غا موقع ور صاحب زاداں، ماتا گجری جی تے شری گورو گوبند سنگھ جی نانہہ خراج عقیدت پیش کرتا واں کہی تے ایمان و انسانیت واسطے اُن غی عظیم قربانیاں نانہہ یاد کیو۔ لیفٹیننٹ گورنر نے لوکاں تیں اپیل کی کہ سکھ گرواں غی عظیم وراثت نانہہ آپسی ہم آہنگی، اتحاد تے سماجی ترقی غے ذریعے زندہ رکھیو جے۔ اُنہاں نے تنوع مانہہ اتحاد ور زور دیتا واں کہیو کہ ایک خوشحال تے مضبوط قوم غی تعمیر ہم سب غی مشترکہ زہم داری ہے۔

RAILWAYS SPL TRAIN

شمالی ریلوے غا جموں ڈویژن نے نواں سال غا رش نانہہ سنبھالن واسطے نویں دلی تے شری ماتا ویشنو دیوی کٹرہ غے بشکار خصوصی ریزرو ریل گڈی سروس غو اعلان کیو ہے آکاشوانی جموں گا نامہ نگار غے مطابق 16 کوچاں ور مشتمل یاء خصوصی ریل گڈی اج تیں پہلی جنوری 2026 توڑی یاتریاں تے سیلانیوں واسطے چلائی جیں غی ٹرین نمبر 04081 نویں دلی تیں کٹرہ جے غی جد کہ 04082 واپسی غا رستہ ور چلے غی یاء ریل گڈی رستہ مانہہ اہم سٹیشناں ور رُکے کی ریلوے عہدے داراں غو کہنو ہے جے یاء سروس تہواراں غا موسم مانہہ مسافراں گا زیادہ رش نانہہ سنبھالن مانہہ مددگار ثابت وے غی۔

DASTAAN E MIC

صوبائی کمشنر جموں رامیش کمار نے کل داستان مائیک مانہ شرکت کی جہڑی نوجواناں واسطے ایک اوپنن مائیک تقریب تھی تے اس غو انعقاد نوجواناں بارے خدمات تے کھیڈا غا ڈائریکٹوریٹ غی طرفوں بابو پلازہ مانہ کیو گیو تھو اس موقع ور صوبائی کمشنر موصوف نے نوجواناں ور زور دتو جے وے اپنی توانائی نانہ کھیڈاں ادبی تے اظہاراتی فنون مانہ استعمال کریں تانجے سماجی برائیاں تیں پاک صحت مند زندگی گزار سکیں اس تقریب مانہ نوجوان فنکاراں غی طرفوں شاعری موسیقی تے کہانی سنان غا مظاہرہ پیش کیا گیا خطاب کرتا واں اُنہاں نے نوجواناں نانہ حوصلہ افزاء پلیٹ فارم فراہم کرن واسطے مزید ایسا جدید پروگرام منعقد کرن غی ضرورت ور زور دتو کیونجے نوجوان بے پناہ صلاحیت تے نواں خیالات تیں بھر پور ہیں۔

JASROTA ECO SENSITIVE ZONE

جسروٹہ جنگلی حیاطیات بارے محفوظ جگہ غا ماحولیاتی حساس زون واسطے مجوزہ ڈونل ماسٹر پلان ور غور خوص واسطے کل کٹھوعہ مانہ ایک میٹنگ منعقد ہوئی جس غی صدارت ڈپٹی کمشنر راجیش شرما نے کی اس منصوبہ مانہ ماحولیاتی حساس زون غا تحفظ تے پائیداد ترقی واسطے 10 براں غو کم کاجی ٹہانچو تجویز کیو گیو بے یوہ مسودو علاقائی سرویز تے مقامی باشنداں سنگ مشاورت غے بعد تیار کیو گیو بے جس مانہ سرگرمیاں نانہ فروغ یافتہ ضابطہ شدہ تے ممنوعہ ذمراں مانہ تقسیم کیو گیو بے اس مانہ حیاتیاتی تنوع غا تحفظ انسان تے جنگلی ضیاط غے بشکار تصادم غا انتظام تے ماحولیاتی سیاحت غی ترقی غے متعلق اقدامات وی شامل ہیں۔ ڈپٹی کمشنر کٹھوعہ تے متعلقہ محکماں نانہ ہدایت دتی جے حتمی منظوری تیں پہلاں 10 دنان غے اندر اپنی تجاویز پیش کریں۔

JAMMU MARATHON

جموں کشمیر پولیس پلک اپنا شہری کاروائی غا پروگرام غے تحت گلشن گرونڈ مانہ ایکتا بارے دوڑ جموں میراتھون 2025 غو انعقاد کرے غی میراتھون مانہ مفت اندراج ٹی شرٹس ہلکا پھلکا کھان پین ثقافتی پروگرام تے قرعی اندازی شامل ہیں تمام عہد غا افراد بشمول مرد خواتین جوننیز سابقہ فوجی تے بزرگ شہریاں واسطے 10 بکھ بکھ ذمرہ بنایا گیا واں ہیں بکھ بکھ ذمراں مانہ کل 4 لکھ 70 ہزار روپیاں غی انعامی رقم دتی جے غی جس مانہ اعلیٰ ترین انعامات 50 ہزار روپیاں توڑی وینگا شہریاں تیں اپیل کی گئی بے جے وے اس بڑی کھیڈاں غی تقریب مانہ شرکت کریں تے اس غی حمایت کریں۔

WEATHER

محکمہ موسمیات غے مطابق جموں کشمیر مانہ 29 دسمبر توڑی موسم جز وی طور ور ابر آلو رہن غا امکان ہیں۔ 30 دسمبر نانہ گجھ مقامات ور ہلکی بارش تے برف باری ہوسکے جد کہ 31 دسمبر تے 1 جنوری نانہ وی ہلکی بارش تے برف باری غا امکان ہیں ، دوجے پاسے جموں شہر مانہ درجہ حرارت 10 عشاریہ صفر ڈگری سلسیش ریکارڈ کیو گیو، جہڑو پہلاں 8 عشاریہ 1 ڈگری تھو۔ جموں ہوائی اڈہ ور درجہ

حرارت 10.2 ڈگری سلسیش ریو جہیڑو جمعرات نانہہ 7.3 ڈگری سلسیش تھو۔ بانہال
مانہہ درجہ حرارت 3.8 ڈگری ریکاڈ ہوو جہیڑو پہلاں 4.8 ڈگری سلسیش تھو، بٹوت
مانہہ 6.1 ڈگری ریو جہیڑو پہلاں 4.7 ڈگری تھو۔ بہدرواہ مانہہ درجہ حرارت 2.6
ڈگری سلسیش ہوگیو جہیڑو پہلاں منفی صفر عشاریہ 3 ڈگری سلسیش تھو۔ رامبن مانہہ
درجہ حرارت صفر عشاریہ 1 ڈگری ریکاڈ ہوو جہیڑو پہلاں 4.2 ڈگری تھو۔ ماہرین
موسمیات غے مطابق اگر چہ درجہ حرارت مانہہ معمولی اضافو ہوو ہے لیکن اوچا
علاقاں مانہہ رات غے وقت صفر تیں نیچے درجہ حرارت برقرار رہن غا امکان ہیں۔
